

Jahresbericht Saison 2009/2010 – Präsident

Seedorf, 03.05.2010

Liebi Unihockeyaner

Mit dr hütige Versammlig ändet mis vierte Amtsjahr, d`Saison 2010/2011 cha o fürs Unihockeyteam TV Wohlen losga.

Da ig nid so guet Hochdütsch redä machi neu mi Jahresbricht uf Mundart. Drfür teil mi Bricht wi immer i drü Abschnitte i: sportleche Rückblick, Vereinsläbe und Ausblick id Saison 2010/2011.

Sportlicher Rückblick

Bereits zum x-te mau het üsi erschti Mannschaft im Cup gäge d`Berner Hurricanes dörfe schpile. O i däm Jahr simer aus Verlürer vum Platz u hei üs doch langsam e chli über di doch eher säutsame Uslosigmethode luschtig gmacht...

Ir Meisterschaft hei üsi Grossfeld Leischtigsmannschafte chönne vorne mitmische. Di erschti Mannschaft het e Saison wi scho lang nümme gha u schliesst ufem sehr guete dritte Rang ab. D`Juniore U18, wo ersch di zwöiti Saison ufem grosse Fäud agiert hei, hei das o zimlech erfougrich gmacht. Aus beschti Zwöitklassierti Mannschaft heimer ad Schwizermeisterschaft dörfe fahre und hei einä vu denä Plämple chönne erschpile. D`U18 Mannschaft 09/10 hout d`Bronzemedaille ir Kategorie U18 Regional.

GRATULATION DER U18 MANNSCHAFT FÜR DIESE LEISTUNG

Das isch e grosse Meilenstein vum UHT TV Wohlen und dr ganze Juniorenabteilig und zeigt doch, dasmer die letschtä Jahre di richtige Prioritäre gsetzt het.

Üsi Aktivmannschafte Herren II, Damen I und Damen II heisech ungerschiedlech guet zrächt gfunge. D`Herren II ud Damen I fingtme im Mittufäud vur Tabelle. D`Damen II wo uf di Sasison ufs Chlifäud hei müesse wächsle, hei chönne zeige dassi o Chlifäudunihockey chöi schpile u hei ihri Gruppe klar gwunne! Last but not least si o üsi ü30 Herre no einisch im Isatz gsi. Ir Kategorie Senioren wird`s vu Jahr zu Jahr herter fürne Spitzenplatz. Dasjahr isch üses knappe Seniorenteam bereits im Viertelfinal usgschidä.

D`Bilanze vude Juniore si i däm Jahr nid ganz so positiv wi letscht Jahr, einzig d`Junioren E unger dr Leitig vum Alain Brechbühler hei e positivi Schlussbilanz und beände ufem erschte Rang. D`Juniore D, C und B si ide hingere Bereiche vur Tabelle z`finge. Troztdäm dass i denä Kategorie dr Spass ud Freud am Unihockey im Vordergrund schein, muesi erwähne dass z`Potential bide Juniore B leider nid ganz het chönne usgschöpft wärde.

Troz auem bini stolz, dass üsi Juniorenabteilig funktioniert und dr Trainerstab ungerenang kommuniziert und ushilft sofarns nötig isch. Dr Ufbou vu derä Struktur het es paar Jahr duuret und isch iz zimlech stabil, jedoch müessemer iz ufgrund vure Regeländerig ufd Saison 2011/2012 luege dasmer no meh Juniore chöi drzue gwinne um so im Juniorenbereich üsi Grossfäudmannschafte witerzführe.

Vereinsleben

Nachem turbulänte Jubiläumsjahr si im letschte Jahr leider nid auzuviu Vereinsaläss gsi! Z`Unihockeyfescht isch ufgrund vu Terminkollisione iz Wasser gheit! Für das Jahr heimer e Termin und e Ort gsetzt u wei luege dases ganz sicher klappt. Witers dadzue de ir Agenda. E Wuche vor Meisterschaftsbeginn simer mit vier Mannschafte de o wider iz Trainingslager uf Le Sentier. Da hei di eintä oder di angere das verpasste Unihockeyfescht no nacheghout. Angeri heisech im Schauspielere versuecht u dr LS us W hetsech aus Regisseur i Szenä gsetzt.

O es X-Mas Game heimer das Jahr nid düregfüert, da d`Organisation für so Sache meischtens a mir oder am Rine hange blibt u mir beidi fasch a jedem Wucheänd im Isatz si, heimer das nid ufd Agenda ta.

Im März si d`Schneesportler unger üsne Mitglieder de wi gwohnt iz obligate Schiweekend uf Rosswaud. Leider het dört z`Wätter nid so mitgmacht, aber so hei es paar e guete Grund gha chli lenger z`blibe hocke.

Ausblick

Im Juiorebereich chöi mir witerhin mit eim Team uf jedere Stufe id Meisterschaft. Bereits chunnt dr eget Nachwuchs i di erschti Mannschaft und wenn di Junge am UHT TV Wohlen witerhin treu blibe chönnts ines paar Jahr e chline Generationewächsu gä.

Im Aktivbereich verlüre mir e Mannschaft. Üsi tröie Damen II Dame heisech mit Seedorf zämegschlosse und wärde für Seedorf ir Erschtliga schpile und bi üs dr Ustritt gä.

Letscht Jahr a derä Stell hani atönt dases mis letschtä Jahr wird si. Leider hani no niemer gfunge wo mis Amt mit 100 prozäntiger überzügig wet mache und darum wirdi sofärn mi d`Versammlig widerwäut no es Jahr ahänke. Nächschts Jahr woti us private Gründ aber definitiv höre. Aui interessänte dörfesech gärn bi mir mäude.

I bi froh dassech dr ganz Vorstand nomau zur Wiederwahl stellt, denn mittlerwile simer doch es igschpiuts Team.

I däm Sinn fröii mi ufne spannendi und herousforderndi Saison 2010/2011.

Merci weti o denä säge wo Wuche für Wuche freiwillig fürs Unihockey Zit ufwände und e grosse Teil zum Vereinsläbe biiträge.

Bruno Boner, Präsident